



Број/Број: 01/а  
Сарајево/Sarajevo, 12.07.2012.

PRIMLJENO: 16.07.2012			
Organizaciona jedinica	Klasifikaciona oznaka	Redni broj	Broj priloga
01-02-1-32		12	

ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ  
ПРЕДСТАВНИЧКИ ДОМ

n/r Milorada Živkovića, predsjedavajućeg

**Predmet: Prijedlog zakona o izmjenama i dopunama Zakona o sportu u Bosni i Hercegovini**

Na osnovu čl. 99. i 100. Poslovnika Predstavničkog doma Parlamentarne skupštine BiH ("Službeni glasnik BiH", br. 33/06, 41/06, 81/06, 91/06, 91/07, 87/09 i 28/12), kao ovlašteni predlagač, dostavljam **Prijedlog zakona o izmjenama i dopunama Zakona o sportu u Bosni i Hercegovini** radi razmatranja i usvajanja u Parlamentarnoj skupštini BiH.

Predlažem da se Prijedlog zakona razmatra po redovnom zakonodavnom postupku.

U prilogu Vam dostavljam tekst Prijedloga zakona s obrazloženjem na bosanskom jeziku, odredbe Zakona o sportu u BiH koje se mijenjaju odnosno dopunjuju i elektronsku verziju Prijedloga zakona.

S poštovanjem,

Drugi zamjenik predsjedavajućeg  
Predstavničkog doma  
dr.sci. Denis Bećirović

## **Prijedlog**

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na \_\_ sjednici Predstavničkog doma, održanoj \_\_\_\_\_ i na \_\_ sjednici Doma naroda, održanoj \_\_\_\_\_, usvojila je

### **ZAKON**

#### **O IZMJENAMA I DOPUNAMA ZAKONA O SPORTU U BOSNI I HERCEGOVINI**

##### **Član 1.**

U Zakonu o sportu Bosne i Hercegovine („Službeni glasnik BiH“, br. 27/08 i 102/09) u članu 2. nakon tačke d) dodaje se nova tačka e) koja glasi:  
„e) sportsko obrazovanje.“

##### **Član 2.**

U članu 9. nakon tačke e) dodaje se nova tačka f) koja glasi:  
„f) ciljevi i zadaci razvoja sporta, aktivnosti potrebne za provođenje tih ciljeva i zadataka, te određuju nosioci razvoja i mjere kontrole njegove realizacije.“

##### **Član 3.**

U članu 10. riječi: „pribavljene saglasnosti“ zamjenjuju se riječima: „pribavljena mišljenja“.  
U istom članu iza stava (1) dodaje se stav (2) koji glasi:  
„(2) Vijeće ministara BiH donosi godišnji program realizacije Strategije i Programa razvoja sporta u Bosni i Hercegovini u kojem se utvrđuju nosioci pripreme i realizacije, rokovi i izvori finansiranja.“

##### **Član 4.**

U članu 22. stav (3) briše se.

##### **Član 5.**

U članu 39. u stavu (2) nakon tačke c) dodaje se nova tačka d) koja glasi:  
„d) Sportista kojem drugi takmičar pri takmičenju nanese tjelesnu povredu ima pravo na naknadu štete, ako mu je povreda nanesena namjernim ili grubim kršenjem sportskih pravila.“

##### **Član 6.**

U članu 47. u stavu (2) iza riječi: „U sportskim takmičenjima može učestvovati samo lice za koje je“, dodaju se riječi: „u periodu od šest mjeseci prije sportskog takmičenja“.

##### **Član 7.**

U članu 51. stav (1) riječi: „na nivou Bosne i Hercegovine“ mijenjaju se riječima: „u Bosni i Hercegovini“.

U članu 51. stav (2) mijenja se i glasi:

„(2) Organizator je dužan osigurati nesmetano i sigurno održavanje sportskih priredbi i sportskih takmičenja. Organizator je dužan preduzeti mjere koje omogućavaju predupređenje rizika nastanka štete za učesnike, gledaoce i treća lica (upozorenja, isticanja zabrana, davanja obavještenja i uputstava i sl.)“.

U članu 51. nakon stava (2) dodaju se novi stavovi (3), (4), (5) i (6) koji glase:

„(3) Organizator sportskih priredbi i sportskih takmičenja dužan je, imajući u vidu njihov značaj, očekivani broj gledalaca i druge okolnosti, utvrditi da li postoji izražen rizik da za vrijeme njihovog održavanja dođe do nasilja ili nedoličnog ponašanja gledalaca.

(4) Ako postoji opasnost iz stava (3) ovog člana, organizator sportskih priredbi i sportskih takmičenja dužan je preduzeti potrebne sigurnosne mjere u skladu sa zakonom.

(5) Sportske organizacije, sportisti i drugi učesnici sportskog takmičenja dužni su saradivati s organizatorom i ne smiju svojim postupcima izazivati ili doprinostiti nasilju ili nedoličnom ponašanju gledalaca.

(6) Sportske organizacije obavezne su podsticati organiziranje i dobro ponašanje klubova navijača.“

#### **Član 8.**

U članu 66. nakon stava (1) dodaje se novi stav (2) koji glasi:

„(2) Javne potrebe u sportu na državnom nivou su:

- a) podsticanje i afirmiranje sporta, posebno sporta djece, mladih, studenata i lica s invaliditetom,
- b) podsticanje planiranja i izgradnje sportskih objekata,
- c) briga o vrhunskim sportistima,
- d) djelovanje sportskih saveza i Olimpijskog komiteta BiH,
- e) djelovanje informatičkog sistema u sportu,
- f) naučni i razvojni programi u sportu,
- g) međunarodna sportska saradnja i međunarodne obaveze BiH,
- h) dodjeljivanje državne nagrade za sport.

#### **Član 9.**

Nakon člana 68. dodaje se novi šesti dio koji glasi:

„DIO ŠESTI A – DRŽAVNA NAGRADA ZA SPORT

Član 69. mijenja se i glasi:

#### **„Član 69.**

##### **(Državna nagrada za sport)**

(1) Državna nagrada za sport (u daljnjem tekstu: državna nagrada) najviše je priznanje koje Bosna i Hercegovina dodjeljuje za posebne rezultate i doprinos od posebnog značaja za razvoj sporta u Bosni i Hercegovini.

(2) Državna nagrada dodjeljuje se stručnim i javnim radnicima u oblasti sporta, sportistima, pravnim i fizičkim licima koja obavljaju sportsku djelatnost te drugim pravnim i fizičkim licima zaslužnim za razvoj sporta.

(3) Državna nagrada dodjeljuje se u obliku medalje, posebne diplome i novčane nagrade.“

## **Član 10.**

Nakon člana 69. dodaju se novi članovi 69a. i 69b. koji glase:

### **„Član 69a.**

#### **(Komisija za državne nagrade)**

- (1) Državna nagrada za sport dodjeljuje se za višegodišnje uspješno djelovanje u sportu, osvajanje olimpijske medalje, posebno naučno, stručno, pedagoško ostvarenje ili sportsko dostignuće.
- (2) Odluku o državnoj nagradi donosi Komisija za državnu nagradu za sport (u daljnjem tekstu: Komisija za državnu nagradu).
- (3) Komisija za državnu nagradu ima predsjednika i pet članova, koje bira Parlamentarna skupština BiH među uglednim sportskim i javnim radnicima, istaknutnim sportistima i drugim istaknutnim stručnjacima iz oblasti sporta na vrijeme od četiri godine, na prijedlog Vijeća ministara BiH.
- (4) Državna nagrada dodjeljuje se kao godišnja nagrada i nagrada za životno djelo.
- (5) Svaka od tih nagrada licima iz člana 69. stav (2) može se dodijeliti samo jednom.
- (6) Vijeće ministara BiH donosi pravilnik kojim bliže utvrđuje kriterije za dodjelu državne nagrade, način rada Komisije za državnu nagradu i druga pitanja značajna za dodjelu državne nagrade.

## **Član 69b.**

#### **(Osiguravanje sredstava)**

- (1) Dodjela državne nagrade je od državnog interesa, a sredstva za njenu dodjelu osiguravaju se u budžetu institucija Bosne i Hercegovine.
- (2) Visinu novčanog dijela godišnje nagrade i nagrade za životno djelo odlukom će odrediti Vijeće ministara BiH.“

## **Član 11.**

U članu 71. u stavu (1) nakon tačke g) dodaje se tačka h) koja glasi: „h) ako organizira sportsko takmičenje i sportsku priredbu u BiH, a ne ispunjava uslove iz člana 50. ovog zakona.“.

## **Član 12.**

Ovaj zakon stupa na snagu osmog dana od dana objavljivanja u "Službenom glasniku BiH".

PSBiH broj: \_\_\_\_\_/12.

Sarajevo, \_\_\_\_\_ 2012. godine

**Predsjedavajući**  
Predstvaničkog doma  
Parlamentarne skupštine BiH

---

**Predsjedavajući**  
Doma naroda  
Parlamentarne skupštine BiH

---

# **O b r a z l o ž e n j e**

## **I. USTAVNI OSNOV**

Ustavni osnov za donošenje Zakona o izmjenama Zakona o sportu u BiH sadržan je u odredbama člana IV./4 a) Ustava BiH prema kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva ili za vršenje funkcija Skupštine Bosne i Hercegovine po Ustavu.

## **II. RAZLOZI ZA DONOŠENJE ZAKONA**

Razlog za donošenje ovog zakona je preciznije definiranje već postojećih odredbi Zakona o sportu u BiH.

## **III. OBRAZLOŽENJE POJEDINIH RJEŠENJA**

U članu 1. Prijedloga zakona precizira se definicija sporta, tako što se dodaje i sportsko obrazovanje koje treba da omogući obučavanje u fizičkom vježbanju, razvoj fizičkih sposobnosti i sticanje sportskih navika.

U članu 2. precizira se sadržaj Strategije razvoja sporta u BiH, koja obavezno treba da sadrži zadatke i ciljeve razvoja sporta.

Članom 3. predlaže se donošenje godišnjeg programa realizacije Strategije i Programa razvoja sporta, kako bi se na taj način utvrdili nosioci aktivnosti, rokovi izvršenja i izvori finansiranja.

Članom 4. predlaže se brisanje stava (3) u članu 22. kojim se definira organizaciona struktura sportskog saveza, koja polazi od klubova, koji se, shodno izraženom interesu i slobodnoj volji, udružuju u strukovne saveze BiH, entitetske ili, u zavisnosti od razvijenosti sporta, i u druge organizacione cjeline. S obzirom da je praksa evropskih zemalja da je klub osnovna organizaciona jedinica koja mora imati pravo slobodnog udruživanja u više nivoe, stav (3) u potpunosti odudara od takvih principa, te je samim tim nepotreban.

U članu 5. predlaže se osiguranje prava na naknadu štete sportistima koji zadobiju tjelesnu povredu namjernim ili grubim kršenjem sportskih pravila, što je jedno od osnovnih prava sportista zagantirano u većini razvijenih evropskih zemalja.

U članu 6. predlaže se preciziranje perioda utvrđivanja opće zdravstvene sposobnosti lica koje želi učestvovati na sportskom takmičenju.

U članu 7. predlaže se utvrđivanje obaveza organizatora i uslova koje organizator sportskog takmičenja mora ispuniti prije održavanja sportskog takmičenja ili priredbe.

Članom 8. propisuje se definiranje javnih potreba BiH u oblasti sporta.



Članovima 9. i 10. predlaže se ustanovljenje državne nagrade za sport, koja bi se dodjeljivala za izuzetna sportska dostignuća i doprinos od posebnog značaja za razvoj sporta u Bosni i Hercegovini. Zakonsko uvođenje državne nagrade za sport predstavlja svojevrsno priznanje ali i dodatnu motivaciju za sve one koji u budućnosti budu uspješno djelovali u sportu, osvajali olimpijske medalje i ostvarivali naučna, stručna i pedagoška dostignuća u oblasti sporta. Predlaže se da Vijeće ministara BiH posebnim aktom utvrdi uslove za dodjelu nagrade, način rada Komisije za državnu nagradu i druga pitanja značajna za dodjelu nagrade.

U članu 11. predlaže se kažnjavanje organizatora sportskih takmičenja i priredbi u BiH, koji ne organiziraju sportska takmičenja u skladu s Evropskom konvencijom o suzbijanju nasilja, nedoličnog ponašanja gledalaca na sportskim priredbama, posebno na fudbalskim utakmicama.

#### **IV. FINANSIJSKA SREDSTVA**

Za provođenje ovog zakona potrebna su određena finansijska sredstva i to za dodjelu novčanog dijela državne nagrade za sport. Ali, s obzirom da se radi o izmjenama i dopunama Zakona o sportu u BiH kojim je već predviđeno postojanje državne nagrada za sport, finansijska sredstva za provođenje ovog zakona već su osigurana u budžetu institucija BiH.



Година XII  
Уторак, 1. априла 2008. године

Број/Број  
**27**

Година XII  
Уторак, 1. априла/ travnja 2008. године

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine je, na 20. sjednici Predstavničkog doma, održanoj 16. januara 2008. godine, i na 12. sjednici Doma naroda, održanoj 25. februara 2008. godine, usvojila

## ZAKON

### O SPORTU U BOSNI I HERCEGOVINI

#### DIO PRVI- OPĆE ODREDBE

##### Član 2.

##### (Definicija sporta)

Sport, u smislu ovog Zakona, obuhvata:

- a) sportske aktivnosti i igre organizirane radi postizanja sportskih dostignuća koja se ostvaruju prema utvrđenim pravilima (sportska takmičenja i sportske priredbe),
- b) sportske aktivnosti i igre koje se organiziraju s ciljem unapređenja zdravlja ili rekreacije (sportska rekreacija, sport za sve),
- c) sportske aktivnosti organizirane za invalidna lica,
- d) organizirani školski i univerzitetski sport.

#### POGLAVLJE II. JAVNI INTERES I CILJEVI BOSNE I HERCEGOVINE U SPORTU

##### Član 9.

##### (Sadržaj Strategije)

Strategijom se utvrđuju:

- a) osnovna polazišta i pravci razvoja,
- b) sadržaj i obim sportskih djelatnosti koji se finansiraju, odnosno sufinansiraju iz budžeta Bosne i Hercegovine,

- c) razvojni i stručni zadaci u sportu,
- d) okvirni kriteriji za vrednovanje programa i njihovog finansiranja u sportu,
- e) nosioci razvoja i mjere kontrole njegove realizacije.

Član 10.

**(Validnost Strategije i programa razvoja)**

Strategiju i Program razvoja sporta u Bosni i Hercegovini usvaja Parlamentarna skupština BiH, na prijedlog Vijeća ministara BiH, uz prethodno pribavljene saglasnosti entiteta i Brčko Distrikta Bosne i Hercegovine.

**DIO DRUGI- ORGANIZIRANJE SPORTA**

**POGLAVLJE I. PRAVNA LICA (SPORTSKA UDRUŽENJA)**

Član 22.

**(Sportski savez)**

- (1) Sportski klubovi u pojedinim sportovima udružuju se u sportske saveze radi ostvarivanja zajedničkih interesa i ciljeva.
- (2) Sportski savezi organiziraju se na nivou Bosne i Hercegovine i entiteta, a u zavisnosti od razvijenosti sporta, i na drugim nivoima administrativnog organiziranja u Bosni i Hercegovini. Za jedan sport može se na nivou Bosne i Hercegovine osnovati samo jedan sportski savez.
- (3) Sportski savez Bosne i Hercegovine osniva se u skladu s ovim Zakonom i Zakonom o udruženjima i fondacijama Bosne i Hercegovine, na osnovu odluka entitetskih sportskih saveza o dobrovoljnom udruživanju, a u slučaju spora između entitetskih sportskih saveza, odluku o tome donosi Vijeće ministara BiH.
- (4) Sjedište sportskih saveza Bosne i Hercegovine određuje se na osnovu razvijenosti pojedinog sporta, tradicije, masovnosti i kvaliteta određene sportske grane.
- (5) Ako zbog nerazvijenosti sporta ne postoji organiziran sportski savez na nivou jednog entiteta, registracija saveza na nivou Bosne i Hercegovine za taj sport izvršit će se uz saglasnost Ministarstva civilnih poslova BiH, a do ispunjenja uvjeta iz stava (3) ovog člana.

**DIO TREĆI- PRAVA I OBAVEZE SPORTISTA, STRUČNI RAD, ZDRAVSTVENA ZAŠTITA I ANTIDOPING**

**POGLAVLJE I. PRAVA I OBAVEZE SPORTISTA**

Član 39.

**(Prava sportista)**

- (1) Sportista je obavezan da se pridržava općih i posebnih pravila propisanih ovim Zakonom, zakonima o sportu entiteta, pravilima svojih organizacija i pravilima međunarodnih sportskih asocijacija.
- (2) Osim prava iz člana 37. ovog Zakona, sportista ima pravo da:



- a) bude zaštićen od svake vrste duhovnog i fizičkog nasilja, ugrožavanja slobode ljudskog i sportskog integriteta, zdravlja i sportskog dostojanstva,
- b) koristi sportske objekte i opremu, usluge stručnog rada i zdravstvene zaštite u skladu s propisima kojima je to regulirano,
- c) na osnovu slobodno izražene volje, učestvuje u reprezentativnim selekcijama.

### POGLAVLJE III. ZDRAVSTVENA ZAŠTITA U SPORTU I ANTIDOPING KONTROLA

#### Član 47.

##### **(Obavezna zdravstvena zaštita)**

- (1) Zdravstvena zaštita obavezna je za sve učesnike u sportu.
- (2) U sportskim takmičenjima može učestvovati samo lice za koje je utvrđena opća i posebna zdravstvena sposobnost, koju utvrđuje ovlašteni ljekar specijalista sportske medicine.

### DIO ČETVRTI- SPORTSKA TAKMIČENJA I PRIREDBE, SPORTSKI OBJEKTI I SUZBIJANJE NEDOLIČNOG PONAŠANJA NA SPORTSKIM PRIREDBAMA

#### Član 51.

##### **(Sistem, uvjeti i organizacija takmičenja)**

- (1) Sistem, uvjete i organizaciju sportskih takmičenja na nivou Bosne i Hercegovine utvrđuju sportski savezi Bosne i Hercegovine u skladu s odredbama ovog Zakona i pravilima međunarodnih sportskih asocijacija.
- (2) Sistem, uvjete i organizaciju sportskih takmičenja na entitetskom nivou utvrđuje entitetski sportski savez.

### DIO ŠESTI- FINANSIRANJE SPORTA

#### Član 66.

##### **(Finansiranje javnog interesa Bosne i Hercegovine)**

Javni interes u sportu u Bosni i Hercegovini ostvaruje se sufinansiranjem iz sredstava budžeta institucija Bosne i Hercegovine na osnovu Strategije, dugoročnih i godišnjih programa razvoja sporta u Bosni i Hercegovini.

#### Član 69.

##### **(Državna nagrada za sport)**

Za izuzetan doprinos u razvoju sporta i afirmaciju Bosne i Hercegovine utvrdit će se državna nagrada za sport. Vijeće ministara BiH će, na prijedlog Ministarstva civilnih poslova BiH, donijeti odluku o ustanovljenju državne nagrade za sport, kao i kriterije za njenu dodjelu.

### DIO OSMI- KAZNENE ODREDBE

#### Član 71.

- (1) Novčanom kaznom u iznosu od 5.000,00 KM do 10.000,00 KM kaznit će se za prekršaj pravno lice ako:
- a) obavlja sportsku djelatnost a nije registrirano u skladu s članom 14. ovog Zakona i upisano u poslovni registar iz člana 15. ovog Zakona,
  - b) obavljanje stručnih poslova u sportu povjeri licima koja za to ne ispunjavaju uvjete iz čl. 44., 45. i 46. ovog Zakona,
  - c) omogući da u sportskom takmičenju učestvuje lice za koje nije utvrđena opća ili posebna zdravstvena sposobnost,
  - d) organizira sportsko takmičenje i sportsku priredbu u Bosni i Hercegovini a ne ispunjava uvjete iz člana 52. ovog Zakona,
  - e) organizira međunarodno sportsko takmičenje ili sportsku priredbu bez saglasnosti organa iz člana 54. ovog Zakona,
  - f) ne zasnuje radni odnos sa sportistom, stručnim radnikom, stručnim i administrativnim zaposlenikom u skladu s članom 35. ovog Zakona,
  - g) organu uprave ne dostavi u propisanom roku tražene podatke ili akte u vezi s postupanjem u upravnom postupku i vršenju upravnog nadzora.
- (2) Novčanom kaznom u iznosu od 1.000,00 KM do 5.000,00 KM kaznit će se za prekršaj fizičko lice ako:
- a) se ne pridržava odredbi iz člana 40. ovog Zakona,
  - b) se bavi stručnim radom u oblasti sporta a ne ispunjava uvjete iz čl. 44., 45. i 46. ovog Zakona,
  - c) nema dozvolu za rad iz člana 42. ovog Zakona.
- (3) U slučaju ponovnog prekršaja, prekršilac će se kazniti maksimalnom novčanom kaznom iz st. (1) i (2) ovog člana.

PSBiH broj 168/08  
25. februara 2008. godine  
Sarajevo

---

Predsjedavajući  
Predstavničkog doma  
Parlamentarne skupštine BiH  
dr. **Milorad Živković**, s. r.

---

Predsjedavajući  
Doma naroda  
Parlamentarne skupštine BiH  
**Sulejman Tihić**, s. r.

---